

于浩◎編

明清史料叢書

續編



源普先生遺稿



國家圖書館出版社

于浩◎編

明清史料叢書

續編

11

圖
國家圖書館出版社

第十一冊目錄

勝朝遺事初編

六卷

(清)吳彌光輯

(清)宋澤元重訂

.....

一

卷四

倭變事略

(明)採九德撰

.....

一

卷五

靖海紀略

(明)鄭茂撰

.....

一一五

病榻遺言

(明)高拱撰

.....

一四七

星變志

(明)佚名撰

.....

二四三

鈴山堂書畫記

(明)文嘉撰

.....

二六九

卷六

碧血錄

(明)黃煜輯

.....

三〇七

采常吉倭變事畧序

國家德敷九有光被海隅百八十餘禩以來恬如
一口人不知兵久矣自嘉靖癸丑歲倭夷騷動閩
浙蘇松之境中患我邑數載勿靖幸而漸就殲滅
然東南罷敝極矣余世居海濱目擊時變追惟往
昔四郊廬舍鞠爲煨燼千隊貔貅空填溝壑既傷
無辜之軀命復沒有生之脂膏聞者興憐見者隕
涕矧余本支世胄盡忠效死叨蔭國恩余也能無
記述示子姓俾識時艱以善繼前人之志乎爰攷

其顛末於左

嘉靖三十七年歲次戊午十二月鹽官采九德識

倭變事略

采九德

嘉靖三十二年癸丑夏四月二日一海船長八九丈餘泊鹽邑演武場北新塘觜約賊六十餘皆髡頭烏音有鎗刀弓矢而無火器時備倭把總指揮王應麟率本衛驍兵數百而出賊見我兵不敢動王遣陸路指揮王彥忠率軍百餘至船詢所以來而譯言莫通惟以小木櫃置書其中曰吾日本人也來自吾地以失舵願假糧食修吾舵卽返幸無吾逼逼則我爾死生未判也時承平久邑人相攜

往觀嘻然莫爲虞日甫西彥忠率衆逼船倭盡起立以燕尾利鏃射數軍皆立死諸觀者始知懼奔入城遂塞門爲拒守計矣會雨夜昏黑防少懈漏四鼓賊留半在船其半登陸路而遁

次日侵晨軍人胡士澄持火藥數斗奮身上船焚之火發賊突起胡遂被殺酋長有八大王者從火中奮躍膚毛盡焦獨舉二刀拂火飛斫我軍跳擲數四而倒焚死者十餘賊生擒被傷者六賊縛置北城圍內刀瘡傷處見其痕多無血人咸異之其

遁賊沿塘而北經白苧橋就民家索食由腹裏抵
新行鎮所過殺傷十數人初四日官兵追及之至
矮婆橋力戰是日大雨泥濘勇士茅堂手梟當先
一倭諸軍咸盡力血戰良久賊以半出戰以半伏
草麥林莽中戰酣伏發而茅堂舒惠敖震素稱勇
敢者皆戰歿我軍死者十八人賊皆割取其首排
列橋上此海上兵與倭交鋒之始也初賊執一民
欲導出海口怪引入腹內殺之復執民以髮貫耳
鼻曳而行自竹林廟經平湖縣地典史喬父子率

月
兵壯邀擊喬遇害兵士死者十七人云

賊至乍浦匿天如宮把總王應麟率兵圍之賊以
神前長旛編帆絞綵既備向軍前紿曰我等不敢
與將軍戰乞退舍俟海潮至各願自投海死是爲
兩全毋作刀下鬼我師輕信之而退賊持帆綵衝
出掠哨船脫去

五月二日青村有賊四十二人卽前賊同夥緣失
風上青村海岸不知前賊船已焚於吾鹽沿海覓
船不得由金家灣潛踰梁庄至白馬廟匿黃姓民

家登屋哨望壞壁開扉以防不虞指揮滿朝率仁
浦軍數十人追及遂圍之賊從屋上麾白旗招賊
黨出鬪朝關弓射斃之賊窘甚用門屏蔽出入處
朝逼之不虞白馬廟中更有賊突出朝腹背受敵
奮勇砍殺以兵寡難支死焉時有千戶王繼隆百
戶朱堂康綬俱被殺官軍死者二十人賊有善卜
筮者每日侵晨卜筮爲謀畫勝算有詩題廟壁云
海霧曉開合海風春復寒衰顏歡薄酒老眼傲驚
湍叢市人家近平沙客路寬明朝晴更好飛翠潑

征鞍鄭端簡公論倭奴之變多由中國不逞之徒如衣冠失職書生不得志者投其中爲之奸細爲之鄉導觀此四十餘賊亦有能題詠者則倡亂者豈真倭黨哉厥後徐海王直毛烈等竝皆華人可信矣

賊屯白馬廟連四日不出南北沮絕無一行者協總指揮馬呈圖檄指揮采煉率澈浦驍兵三百合衛所軍千餘屯教場三晝夜不進蓋欲俟彼至而擒之謂以逸待勞計也時指揮王彥忠帥陸軍三

百指揮徐行健帥湖兵四百俱屯教場承平日久
軍心怠忽若霸上棘門然

初六日侵晨我軍星散至柴家埭炊餉賊分五六
夥而來服色裝束與我爲一衆以爲逃竄民也且
海霧溟濛天色似明未明不可細辨一夥自海邊
來者擊吾首一夥自裏塘來者擊吾尾從中要擊
者二三夥衆皆潰亂奔逃馬總被一鎗穿背背死
采乘騎擊賊傷二賊賊志甚斫其首腮喉處受數
刃而斃千百戶姜節呂鳳姚岑王相等咸被殺一

鼓手搥鼓促戰賊一鎗連鼓釘之地我軍歿者四十餘人城上人下看教塲惟見黯黯殺氣天若爲慘者是戰也非賊智勇亦我軍失策耳賊穴白馬廟纔十餘里耳我軍宿教塲三晝夜觀望不前銳氣消阻且軍宿教塲官自宿柴家埭民家官軍散處統紀絕無蓋其時備倭把總考選指揮任之與指揮俱爲同僚非若今日受敕叅戎有相臨之分以故把總不能束指揮指揮不肯下把總誰爲先鋒誰爲後殿誰爲左右前後奇正之兵誰爲旗牌

監督者在其陣至於三里而探五里而偵者絕無一軍訶報賊既至前猶疑爲逃竄之民迨其四面殺人自相潰敗又何尤耶

是賊既勝意氣揚揚有稱二大王者年二十餘每戰輒揮扇用幻術惑衆獨衣紅袍騎而行至龍王祠祠卽東關要處邑典史李茂率勇士四百守關賊發數矢不動李亦舉旗吶喊放砲示出戰狀賊不敢逼城遵海南行抵馬家堰就袁姓民家食執民導行自腹裏走經礪頭門厯園花塘入海甯縣

界守禦所軍出擊被殺者數百餘窟赭山數日至
錢塘驚子門把總指揮陳善道奉軍門調遣提兵
來禦遇害陳乃叅戎萬鹿園壻也方出師日家人
具饌請食陳大言曰吾滅此而後朝食一遇賊而
陷於伏矣萬將軍素好施捨有少陵僧者自幼行
腳江湖諳武藝手執鐵棍以古大錢貫鐵條於中
長約八九尺重約三四十斤嘗德萬公施欲爲其
壻報仇曰吾輩不願受中丞約束願爲公滅此賊
隨集黨八十餘迎擊賊賊戰每搖白扇僧識爲蜩

蝶陣乃令軍中各簪一榴花僧手撐一傘以行但作採花狀賊二大王者望見僧即若縛手然蓋以術破之也僧以鐵棍擊殺之并殺勇戰者十餘賊僧欲盡滅此賊俾無孑遺我兵從征者爭奪首級至有自相殺傷者僧怒闔其傘賊遂能應敵且四遁矣明日擄錢塘江船入海去

是月二十日督府王公忬檄叅戎湯公克寬來守鹽湯號武河邳州衛指揮有智勇提邳兵三百人皆雄偉長大慣戰者且熟知倭情鹽人自是皆倚

湯將軍矣時邳兵口糧每日人各八分重湯帥也
守道潘公恩巡道姜公延願咸在鹽守禦城中兵
衛驍兵選鋒六百縣鹽共四百處州劉大仲所統
坑兵五百召募湖州水共四百各口糧一日五分
每十日一給而酒肉犒賞守巡府縣絡繹與之是
以兵士願出死力戰守焉

二十三日午浦倭船七隻賊數百圍薄南城口索
糧食守禦指揮姚洪度湯帥必援城上佯許刻日
以待因先剽掠附近村落二十五日湯帥果至賊